



日知堂文集卷五

文集卷五

籍保護

棘津鄭端司直甫

館圖小京

巡撫江寧等處地方提督軍務兼理糧餉都察院右

副都御史 臣鄭端謹

奏

題為欽奉

上諭事該 臣 看得淮揚二屬積滄田地於康熙二十八年

欽差部員勘報仍滄田四萬六千五百二十三頃一十二

畝零部文令委賢能官員踏勘具題轉行江蘇布政

司遵照 臣 蒞任又經飭催茲據布政使李國亮詳稱

前項滄田應循例於康熙二十九年冬勘詳委淮揚

道僉事劉殿邦逐一確勘鹽城縣田一萬七千四百五十五頃九十一畝零又鹽城所屯田一百二十一頃三十八畝零高郵州田一萬六千一百七十三頃四十一畝零泰州田六百二十一頃九十畝零寶應縣田四百四十八頃三十畝零興化縣田一萬一千七百二頃二十畝零因歲值天旱又當下河疏濬已通俱經全涸內鹽城縣并所原有無主永廢田畝案經勘實詳明前撫臣批令於全涸之日分別詳報節年冬勘冊內註明在案至於高泰興寶等州縣田地積滄年久多成荒廢滿目蒿萊開懇不易若一槩勒定議起徵年分另請核

題又宿遷桃源二縣原報逃溺人丁共六千三百七十一丁已經招徠復業應於康熙二十九年一起徵沐陽縣逃溺人丁三千九百四十九丁據稱已溺之丁終成故絕在逃之丁謀生遠去實無歸復等情取具經勘承查各官不扶印結詳報前來又據高郵州知州謝廷瑞申詳二十餘年積滄之地風波洗蕩圩埂全無泥去沙存寸草不萌者有之更且當日水決全家滄沒逃竄他方遺田竟成版荒今若照額催徵不特

逃亡戶口不復思歸卽現在遺黎將見思逃思竄等情又據興化縣知縣陳又新申詳興邑地土積滄二十餘載人民漂溺田畝版荒去歲赤旱雖已盡報全涸而受業無主招徠無人錢糧一例起徵實難責其辦納逐查造冊另文申送亟賜委勘具

題等情臣思錢糧之起科原按田畝小民之輸納惟賴收成若田地拋荒則賦稅無出理固然也高興等五州縣田地從前積滄有年今二十九年冬勘全涸共有四萬六千餘頃之多其中原主逃亡無人認墾與沙淤荒廢不堪樹藝者自是不少其丁存田墾見今

播種者自應照例起徵以裕

國課至若丁逃田荒無人開墾者自當招徠復業稍寬限期以甦民力除飭令該司轉委淮揚道僉事劉殿邦率同淮揚二府履畝踏勘分別實熟實荒造具冊結確議詳報至日另疏

題請及沐邑未復人丁應於下年察實另報并將各結送部查核外相應一并

題明臣謹會同總督臣傅臘塔總漕臣董訥合詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲欽奉

上諭事該

臣

看得淮揚二屬積滄田地康熙二十八年

欽差部員勘報鹽城高郵泰州興化寶應五州縣共仍滄

田四萬六千五百二十三頃一十二畝零於康熙二

十九年冬

臣

行江蘇布政司端委淮揚道僉事劉殿

邦履勘因該年天道亢旱兼之下河疏通俱報全涸

隨據該司道并高興等州縣具詳咸稱積滄年久多

成荒廢更有原主逃亡無人認墾萬難一槩徵輸以

滋包賠累民等情臣卽飭行布政司復委淮揚道率同淮揚二府履畝確勘分晰實荒實熟造具冊結詳奪去後一面於冬勘案內彙疏

題明續准部覆令將涸田丁銀於二十九年_起徵地畝錢糧於三十年_徵解其荒廢無徵情由未經議及時因康熙二十九年地丁錢糧奏銷屆期前田之荒熟尚未勘確不便遽請緩徵又經於奏銷冊內登明俟勘定荒熟分別另報緣由

題達在案今催據布政使李國亮詳稱移准淮揚道僉事劉殿邦勘明各屬原報涸田內可以耕懇者共二

萬二千九百一頃八卡畝零應遵部文將丁銀於涸出之年起徵地畝錢糧於三十年_徵解外其無主版荒田二萬四千四百三十一頃三十二畝零應徵地丁本折錢糧請俟招徠開墾另報陞科等情造具區圖細冊及承勘道府各官印結詳送前來臣查淮揚地方從前疊罹水患田地滄沉人民逃溺蒙我

皇上視民如傷破格蠲賑

發帑治河俾昏墊災黎獲登衽席莫不感頌

皇仁咸慶更生今幸河道安瀾滄田盡涸自當照例起徵何敢復爲置議惟是錢糧之起科原按地畝小民之

輸納惟賴收成查從前節年涸出田畝因地勢稍高陸續先涸易於耕種所以復業小民力能輸將茲者新涸田畝地既窪下積滄又久沙淤泥淖畚插難施修治墾闢工力匪易若不分別荒熟但據見在涸出之田卽令按畝起徵在荒廢者旣無籽粒可收錢糧從何辦納在逃亡者人民尚未復業正賦從何催輸有司迫於考成勢必令里甲包賠株累牽連不特在逃之丁觀望不肯卽回現在之丁亦將畏累逃去不特久荒之田不能墾闢成熟新熟之田亦將棄置復荒_臣等於本年三月內奉

命會勘車路等河路遇小民紛紛呼籲茲復委道府履畝勘明敢不據實備陳爲民請

命所有勘實荒涸田二萬四千四百餘頃相應仰懇

睿慈俯准暫行停徵容_臣等飭令地方各官加意招徠多

方勸墾照墾荒定例按年造冊報部陞科則州縣無包荒之徵小民免賠糧之累自必聞風來歸爭先趨墾而荒田日闢額賦自增

國計民生均有裨益矣除冊結送部查核外_臣謹會同總督臣傅臘塔總漕臣董訥合詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲請

旨行取事該臣看得臺垣缺員行取縣令欲得直言敢諫

之士必求品行端方之人能處民社而盡職斯立

朝班爲無忝臣抵任之日接准部文卽行布按二司詳慎

選擇據實開報又細加體察旣不敢妄舉匪人又何

敢沮抑賢良惟是部行必無錢糧盜案官員方准咨

送而臣屬地方賦重役繁動掛吏議實與他省不同

若拘例以求竟無一人合格是叅罰徒行而薦舉無

聞循吏與庸員總無分別不特無以鼓賢良亦非所以勵不肖臣愚以為察吏之道與其毛舉細故令人救過不遑不如棄短取長使其感而思奮查得揚州府屬江都縣知縣熊開楚出身科目起家詩書蒞任三載有餘操守始終不改和平中正愷悌慈祥士民悅安總無煩擾前經

大計案內格於成例督臣傅臘塔等已曾於疏內指明今查該令任內盜案並無粘帶惟錢糧尚有尾欠實因江都地衝賦重歷來並未全完實非該令催科不力之故臣查前督臣王新命前撫臣湯斌任內有吳縣

知縣劉滋等二員亦以錢糧未完與例不符會疏

題請蒙

皇上破格擢用今熊開楚身任衝繁才守兼優上下相安人無間言據江蘇布政司布政使李國亮江蘇按察司按察使高承爵准揚道僉事劉殿邦揚州府知府施世綸交薦前來合之臣等見聞無異用敢冒昧具

題仰懇

睿鑒俯准破格錄用俾循良感而思奮庸愚愧而企及其於吏治所關非淺鮮也臣謹會同總督臣傅臘塔合

詞具



缺

P9-P11

題伏乞

勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲縣令被叅之後不爲地方所容蠹役乘夜哄鬧庫藏恐有疎虞委員嚴查錢糧虧空最多謹據實

題叅請

旨嚴加議處以儆官胥以杜侵那事竊照上海縣知縣董鼎祚居官酷虐乖張臣會同督臣傅臘塔列款糾叅候

旨發審於本月二十日據松江府海防同知李經政稟稱本月十四日奉布政使司信牌行委卑職赴上海看

守董令時見有上海士民因董知縣居官不好被叅恐汙了他上海縣地方挑水到堂上洗堂以示公辱又不許城內士民借房與董知縣住等情遂諭云鼎祚旣已被叅自有公法問擬爾等百姓豈得無禮卽出示禁諭俱各散去卑職見已相安無事隨親來蘇郡稟覆不意卑職行後聞十六日夜二更時分有人鳴鑼聚集由海關一帶街坊喊罵等情因思上海知縣被叅缺員料理現據布政司詳委署官尚未到任恐地方人衆雜亂乘夜生事庫藏關係遂諭令該同知親赴上海縣查明是何倡鬧并行牌布政司督令

霍元龍等乘夜倡衆情由飭發按察司究訊確供另報外合先據詳


題叅聽部議覆

臣謹具

題伏乞

睿鑒施行

該同知盤查上海縣倉庫有無虧空速速申報於二十四日回稟卑職親到上海縣查係本縣總書霍元龍庫夫王侯潘成等因上海士民挑水洗堂本官受辱不過遂串通無根之人沿街叫罵以圖報復已將爲首倡鬧霍元龍王侯潘成拿解到轅乃董知縣衙役鳴鑼喊罵者其餘皆係一時烏合之人恐干連人衆有悞農業又恐霍元龍等挾仇誣扳是以不便多拿其上海縣倉庫已經盤查明白錢糧虧空數目業已申報布政司轉報等語又據江蘇布政使李國亮詳呈等情到臣據此該臣看得董鼎祚生性酷虐以



缺 P15

人命爲草菅比暱匪人用蠹役爲腹心旣積怨於地方不爲士民所容不思自反乃敢聽信舊役思圖報復昏夜聚衆行同鬼蜮沿街叫罵不顧廉恥獨不思署員未到乘隙作鬧倉庫錢糧所關不小及至委官盤查果缺庫銀二千七百九十四兩六錢三分二釐零又應存節年米一萬六百七石八斗五升二合零顆粒無存倘非臨時賄買棍徒用去卽係平日任意侵那除將董鼎祚虧空錢糧批行布政司速催署官星馳到任再加確查有無未清并將前項缺庫無存銀米查明年分欸項嚴提官役究審追擬并將總書

巡撫江寧等處地方提督軍務兼理糧餉都察院右

副都御史

臣

鄭端謹

題爲亟請循例撥補蠲停荒缺站銀以濟郵傳事該

臣

看得淮揚徐三府州各驛路當孔道應付最繁額編驛站錢糧項下有缺丁沉地坍塌堤廢新涸版荒等項蠲停缺額銀兩係夫馬計口授食之需難以缺悞歷年循例撥補今康熙二十九年分共該缺額銀一萬三千四十五兩九錢零內除邳州沉地逃丁等項蠲缺銀一千六百二十一兩四錢二分零經

臣

另案

咨部業經戶部查明准於本州裁站銀內動給行令

造入奏銷外尚該山清桃宿高寶徐沛等州縣缺額銀一萬一千四百二十四兩四錢八分零節據各州縣印驛等官以衝站差繁夫馬工料一日不能缺少激切詳籲俱經批行布政司查報去後今據布政使李國亮詳請循照邳州一例俱於本地裁銀內撥給其宿遷高郵二州縣本地裁銀不敷應於各屬解司裁站款內補足嗣後照例動支造入奏銷等情並查明實缺應補細數備造款冊前來臣覆核無異除冊送部外相應據詳具

題聽部按冊核覆再查驛站缺額銀兩每年循例請補

必俟奏銷之後部臣核覆方允動支計期已在次年六七月間更或戶兵二部移查駁詰歲月益致遷延夫馬工料經年懸缺豈能久待有司恐誤郵傳勢必那借應急乃每以未奉部文不准銷算非以虧空報叅卽以擅動議處因公獲罪情實堪憫查驛站額編原有定數荒缺撥補歷有舊章初不因動撥之遲早以爲盈縮臣請自康熙三十年爲始准令各州縣照依衝僻定額除動實徵本款外其荒缺不敷銀兩徑於本地裁站等銀內動支年終分晰除蠲實徵缺額撥補各數目與實支扣存款項造冊

題報聽候部臣察核與衝僻定額相符方准開銷若混
冒多支卽嚴加議處是於額編錢糧並無分毫增損
而夫馬工料得以按期支給既不悞衝郵又可免那
借窮官苦役兩有裨益矣臣謹據實

題明伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲賢令因公降調士民愛戴挽留據實

題明以聽

睿裁事該臣看得長洲縣知縣梁廷桂因承審嘉定縣命

案不將原告羈禁以致脫逃事屬疎忽臣不得不照

例

題叅部議降調亦拘於成例不得不然但原告在逃事
出意外而奸民假命害人畏罪免脫實難防閑查長
洲一邑爲蘇郡附郭首縣賦重事繁奸弊叢生最爲

難治官斯土者必須強幹精明方能勝任廷桂年富力強辦事勤敏催科撫字兼擅其長蒞任甫及一載事事俱有頭緒今忽聞降調闔邑士民環籲挽留情詞迫切司府各官稱其循良如出一口臣係同城聞見最真苟不據實入

告是爲蔽賢蔽賢之罪非臣子之所敢出但查保

題官員之例久奉停止臣又何敢違例保留但從地方

民情起見不敢不據實

題明倘蒙

皇上俯鑒廷桂居官人地相宜輿情愛戴過出無心致掛

吏議俾得降級畱任是又

鴻恩出自格外非臣之所敢妄干也臣謹會同總督臣傅

臘塔合詞具

題伏乞

睿鑒施行

巡撫江寧等處地方提督軍務兼理糧餉都察院右

副都御史

臣鄭端謹

題爲屯丁災苦積欠難完仰請

皇仁寬緩分年帶徵以紓軍困事該

臣

看得六合縣屯衛

額徵銀米撥派漕項居多因連遭荒旱歉收以致節

年拖欠纍纍康熙二十八年正月二十五日欽奉

上諭江南全省積年民欠正雜錢糧槩與蠲豁而該縣逋

欠屯糧因係漕項未能邀免自康熙二十四年以至

二十九年六載俱有未完加以三十年新賦同時並

徵屯丁終歲收穫有限奚能兼清數年逋賦以故前

欠未完後欠踵報窮軍疊受血比有司洊罹處分而于正供究不能全况該縣上年又被重災今春民飢乏食幸蒙

皇恩發穀賑濟獲慶更生茲欲以六載未清之項取足于一時不特勢在萬難而追比頻加亦非所以體

皇仁而恤災黎也其上元江寧二縣未完康熙二十五六年等年屯衛銀米亦因歲比不登壓欠纍積不能兼辦情有同然今據江蘇布政使李國亮以群丁呼籲迫切詳議分年帶徵前來臣查三邑康熙二十四年起至二十七年止未完漕項銀米一時併追既難取盈

而屯丁顧此失彼更致有悞新賦仰請

勅下部議准以康熙三十一年起一年帶徵一年在額賦仍無虧缺而軍困卽得稍紓咸沾

聖澤於無涯矣除將該司造報各年未完銀米數冊送部查核外臣謹會同總督臣傅臘塔總漕臣董訥合詞具

題伏乞

睿鑒施行

巡撫江寧等處地方提督軍務兼理糧餉都察院右

副都御史

臣鄭端謹

題爲運船飯米價值太昂折解萬難如數酌議變通之法仰祈

睿鑒事該

臣

看得蘇松常三府屬白糧項下額編運船水

手飯米歲計一萬七百餘石原供駕船水手飯食之

用自康熙十四年白糧抽選漕船裝運遂將飯米裁

省撥充兵糧嗣因白糧改折准部文將正耗春辦飯

米各項槩令每石折銀一兩五錢列入由單編徵迨

至康熙二十二年白糧仍徵本色起運前項飯米亦

循康熙十四年之例按年徵收本色候撥兵糧而部
臣行令照白糧每石一兩五錢折銀解部前任撫臣
遵卽促令折解臣蒞任以來又日事嚴催據各屬自
康熙二十二年起至二十八年止各案報完折解過
米石計算不及十分之一蓋此項編給水手飯食原
屬糙米與起運之白糧不同則折價自難一例從前
每石槩折一兩五錢乃因用兵之際軍餉浩繁一時
權宜原非永遠定例如兵米一項現今估定時價每
石七錢五分折給卽從前漕米改折每石定價亦止
九錢此項運船飯米本與撥充兵糧之米相同而較

之漕糧米色猶屬不及折價倍重所以不能如數變
解若問之於民米價不敷折價必滋派擾責之於官
折價浮於時價何術補苴矧蘇松等屬賦重事繁節
年經手之官率皆降革死亡叅案錢糧尚多懸欠前
任已徵在倉之米誰肯增價改折現任各官本任新
徵應折之米已苦無計出脫又何肯代人折解是以
年復一年雖有折解之行實無折解之利良由定價
懸殊折色重於本色力不能前並非經營各官敢於
怠玩自甘叅罰恐將來存倉日久勢必腐敗不特不
能如數折解卽本色已漸至折耗官民之因此受累

者日深究於

國課亦無裨益茲據布政使李國亮詳請應否隨漕帶
運或遵舊例准放兵糧等情前來臣思從前搭放兵
糧雖有成例但近准部行不允動用是以不便再請
惟此米原係白糧項下編徵本色支給水手之需今
既節省相應隨正起運以供

天庾請自康熙三十年分爲始照數帶運赴

京交納其二十九年以前節年徵貯尚未折解之米爲
數既多恐難一齊洒帶查京口旗營兵糧每年例係
畱漕支給臣請將此項米石就近解給京口兵糧卽

於畱漕米內照數扣除逐年量行帶運不過一轉移
間在額賦毫無虧損而米石無腐折之虞官民免賠
累之苦

京庾有充盈之益

國計民生無便於此者矣臣謹條晰具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲欽奉

上諭事該

臣

看得宿遷等十州縣渰涸田地先因康熙二

十八年冬部司查勘涸田數多部覆以歷年涸出田地隱匿少報令將從前踏勘官員查叅當經行據布政司詳覆田地之渰涸皆由年時之旱澇從前踏勘各官止就當年涸田實數出結原無隱匿少報經

臣

會疏

題覆部臣以二十八年止據報有水災並無報有旱災

至查

上諭以後應議處者並未俱免仍令取具從前踏勘官員職名併遲延之處查明題叅等因復經備行該司遵照去後今據布政使李國亮詳稱查康熙二十八年水災止有本案內宿遷一邑其餘九州縣並未報有水災且宿邑原報係五月下旬六月上旬陰雨連綿河水泛漲當日

題報原案在部可考迨後自秋交冬天道亢旱水退田涸

欽差部員查勘之時正值水勢阻絕是以比從前各年涸

出田地較多若以二十八年勘出之涸田而欲責從前踏勘之官以隱匿少報則如二十九年冬勘報涸田有四萬六千五百餘頃較部員二十八年所勘又多涸田二萬二千五百餘頃豈當日部員亦有少報之理總緣田地之滄涸每年原無一定從前承勘各官實無隱匿少報情弊至於此案部覆查叅雖在上諭以後而康熙二十七年以前承勘各官原在上諭以前况並無隱匿少報自當邀

恩免議等情前來臣查田地之滄涸原因水勢之消長而水勢之消長則視天時之旱澇故涸多涸少原無定

數而忽涸忽渰亦無定期在承勘各官惟按各年涸出之實數具報其間多寡不齊乃時勢使然未可同日而語也康熙二十八年冬適值天道亢旱兼之下河疏濬積水漸消所以涸出較多然彼時部員勘明除涸出田二萬三千餘頃尚有渰沒未涸田四萬六千餘頃至二十九年冬臣委淮揚道路勘方始全涸則是二十九年之涸田更多於二十八年部員查勘之數由此而推可見從前踏勘各官實無隱匿少報也明矣再照此案前撫臣洪之傑准咨行查後因革職解任未經

題覆臣於康熙二十九年十一月初一日蒞任接理查催續據藩司詳報復加駁察於康熙三十年正月二十九日具

題以臣新任展限并扣除年節封印日期止計違限五日承查各官例應免叅相應一並

題明臣謹會同總督臣傅臘塔總漕臣董訥合詞具題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲疲邑連遇災傷窮黎乏食請動捐納米穀給賑以
廣

皇仁事該

臣

看得淮安府屬宿遷睢寧二縣夏被旱災經

臣委官勘明分數取造冊結會疏具

題一面飭令地方各官加意撫綏勸民及時播種秋禾
以冀西成復據該府縣詳報秋禾又遭蝗蝻蠶食兼
之霽雨爲殃收成無望民不聊生亟請具

題將本年應徵錢糧破格蠲免漕米麥項分年帶徵并

動捐貯麥粟賑濟等情_臣等隨批行江蘇布政司作
速移委淮揚道親詣勘明確議通詳去後據淮揚道
僉事劉殿邦詳報遵卽單騎前往宿睢二縣逐處踏
勘宿遷縣除山坡高地幸不成災其餘四野村落有
漸次涸出者有尚在滄沒者豆穀秫蕎等項旣被蟲
傷又遭水漫目擊被災老幼鳩形鵠面嗷嗷待哺睢
寧縣雖附郭地畝漸次涸出被災尚輕至於四野村
落現受水滄豆蔴秫穀收成無望茅房草舍傾頽不
堪小民扶老携幼帶水拖泥亟圖覓食若不亟請賑
恤必致流離失所等情并據布政使李國亮呈詳請
動積貯天下等事案內捐輸穀麥計口給賑又據宿
遷縣知縣李遇桂申詳宿民疊災之後生計已絕朝
夕待斃實難緩待請先行發賑前來_臣查宿睢二邑
地處河濱民貧土瘠從前疊罹水患民生困苦幸蒙
我

皇上特發帑金大修河道邇年水退田涸民獲安耕更蒙
洪恩屢沛蠲賑頻頒殘黎漸有起色不意今歲春夏亢旱
二麥無收繼復蝗蝻肆虐霖霖爲害田禾被傷秋成
又復絕望除將被災情形照例另疏

題報其所請漕糧分年帶徵緣由現催布政司會同糧

道確議一面飭行該地方官加意撫綏勿致流離失
所外惟是一歲兩災小民謀生無計必須速行賑濟
庶免流亡所當仰懇

睿慈允動捐輸米麥容_臣等尚委道府等官查明真正飢
民計口給賑務期盡沾實惠以廣

皇仁統俟事竣之日造冊報部核銷再查淮屬地方多不
產米先經咨明戶部將生俊捐納准以大麥照穀數
交納在案則動賑災民亦應將大麥照穀數散給俾
得充腹療飢合並陳明_臣謹會同總督臣傅臘塔總
漕臣董訥合詞具

題伏乞

睿鑒勅部迅賜議覆行_臣遵奉施行

巡撫江寧等處地方提督軍務兼理糧餉都察院右

副都御史

臣

鄭端謹

題爲欽奉

上諭事該

臣

看得淮揚二屬鹽高泰興寶五州縣積渰田

地四萬六千五百二十三頃一十二畝零於康熙二

十九年冬勘報全涸當據經勘道府州縣各官以積

渰年久地廢丁逃實難一槩起徵情由詳報經

臣

具

疏

題明一面端委淮揚道僉事劉殿邦督同淮揚二府再加履畝確勘并於奏銷冊內登明在案續據前任江

蘇布政使李國亮詳稱該道府勘明前項涸田內可
以耕墾者共二萬二千九十一頃八十畝零應遵部
文將丁銀於本年起徵地畝錢糧於三十年徵解外
無主荒廢田二萬四千四百三十一頃三十二畝零
應徵地丁本折錢糧請俟招徠開墾另報陞科等情
造具區圖細冊及承勘道府各官印結詳送到臣復

經會疏

題請部覆以滄田涸出卽照例起徵錢糧歷年無異今
二十九年勘報全涸其丁銀已經起徵奏銷地畝錢
糧亦照例徵收仍令作速起徵報部等因轉行遵照

間復據各府州縣紛紛詳籲咸稱所勘荒田實係積
滄廢土人戶逃亡萬難勒令包賠等情臣等俱批行

江蘇布政司查議去後今據布政使張志棟覆查無
異具詳前來臣查賦稅出於田畝輸將惟賴收穫必

墾闢有人方可計畝起科若田地拋荒則錢糧從何
辦納查淮揚滄田每年冬勘一次丁銀於本年起科
地畝錢糧於次年徵解此常格定例施於隨滄隨涸
之田未嘗不可但田地不無高低滄沉亦有久暫從
前節年涸出田畝實因地勢稍高易於耕種且爲數
不多復業之民力能認墾故可勉効輸將今高寶等

五州縣涸田共有四萬六千五百餘頃之多積滄至二十餘年之久至康熙二十九年冬時值亢旱兼之下河疏通始得盡數涸出小民可望復業然屋廬久廢器具無資拮据經營方得佈種籽粒收成尚未可必而應納錢糧業已按限徵比措辦無術日苦追呼此尚屬有田可耕有人可問不得不遵照定例責令輸將更有沙淤泥淖畚插難施以及逃亡未歸拋荒遺棄者共計二萬四千四百餘頃積滄田畝墾闢既費工本流離災民招徠更非容易若一槩勒令起徵承種無人有司迫於考成必勒令里甲攤派包賠株置復荒

國賦愈虧民生愈困矣伏思各省荒地皆蒙

皇上浩蕩洪恩一體蠲豁普天率土人慶更生况此淮揚地方曾爲

翠華經臨之地民情土俗無一不在

睿照之中臣等身在地方以撫恤民生爲職任又恭遇

大聖至仁之主洞悉閭閻疾苦雖格於部議一請未允敢不據實披陳再疏

上聞伏乞

特沛恩綸將無主荒廢田畝錢糧暫准停徵容_臣等督令

地方各官加意招徠多方勸墾隨墾隨報按年造冊
達部陞科不過暫緩目前無徵之虛糧可收將來墾
闢增賦之實效其有裨于

國計民生匪淺鮮也再查康熙二十九年涸田丁銀先
因奏銷之時尚未勘定荒熟故不敢遽造停徵原將
田地既有荒廢丁銀無從辦解現催道府勘明另
題緣由登註在冊報部可考相應一並陳明_臣謹會同
總督臣傅臘塔總漕臣董訥合詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲敬陳撥協站銀改歸本地支給以專責成以資郵

傳事該

臣

看得驛站錢糧乃夫馬計口授食之需全

賴支給如期庶餉秣無虧郵傳有濟

臣

屬江蘇淮揚

等府各驛俱水陸要衝

臣

蒞任後卽嚴飭各屬畱心

調劑將工料銀兩按時徵給毋許短少稽延除以本

地編徵卽給本地夫馬者自可不悞惟是有因本處

站銀不敷另以別州縣編徵之銀撥協者卽使按期

協濟已多往返領解之煩甚且膜視遲延以致受協

驛遞支給愆期據各屬紛紛籲請改動本處錢糧支給臣復檄行布政司查議去後茲據布政使李國亮請援康熙七年間遵

諭陳言事一案之例以本處正項錢糧作本處驛站之用他處協濟站銀抵作正項起解將各屬額編撥協銀兩數目造冊詳報前來臣查各驛站銀本地額編之款與別處撥協之數俱係地丁項下徵給在應協之州縣起解支給總屬一體而受協之驛遞令其別屬支領未免守候延衝郵夫馬不能按時接濟查江蘇等八府州屬驛站新訂衝僻歲需夫馬工料等項

共該銀一十九萬六千八十九兩六錢內除本處額編銀一十七萬九千四百一十二兩七錢零應照舊支給外其外屬撥協銀一萬六千六百七十六兩八錢零應如該司所請自康熙三十一年為始改於本處起運地丁款內徑行動給卽以別屬協濟原款改歸起運解司充餉一轉移間正項原無虧絀而郵傳實有裨益矣除冊送部查核外臣謹具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲謹報各屬秋災分數仰祈

睿鑒事該臣看得淮屬宿遷睢寧二縣揚屬興化縣秋被

蝗蝻蟲水等灾情形先據江蘇布政司詳報經臣會

疏具

題一面批行該司確勘被灾輕重分數去後今據署布

政司事江常鎮道叅議楊嘉詳報專委淮揚道僉事

劉殿邦揚州府知府施世綸勘明宿睢興三縣共被

秋灾田地二萬七千二百二十四頃一十六畝零內

宿睢二邑先被夏災今復被秋災地一萬四千三百五拾七頃四十三畝零已於夏災案内

題請照例蠲免外仍該田地一萬二千八百六十六頃七十二畝零應照定例蠲免分數不等共銀四千四百六十八兩二錢一分零造具應蠲銀數清冊同各縣被災分數區圖冊結呈送前來臣覆核無異相應

具

題請蠲再查宿睢二邑本年先被夏災復被秋災地畝因無一歲兩次蠲免之例當卽批行藩司分晰造報并於原疏內

題明在案茲據該司詳稱宿睢二縣素稱荒疲民生困苦今一載之內兩被重災若止拘常例蠲免殘黎終難完納等情臣查宿睢二邑地瘠民貧疊罹災患幸蒙

皇上如天好生之仁頻施蠲賑閭閻稍有起色不意本年先被夏災二麥無收滿望秋成稍延殘喘詎期又遇蝗蝻蠶食霪雨爲害秋成失望餬口無資災民嗷嗷

經臣另疏

題請賑濟焉有餘力以完賦稅若止照常例蠲免夏災二三分尚有應完之七八分有司迫于考成敲朴追

呼勢必逃亡相繼究竟額賦虛懸事關

國計民瘼敢不仰體

皇仁爲民請

命除漕糧徵兌屆期不敢請緩臣仍飭令有司多方勸輸

并漕項錢糧照例催徵外其餘起存錢糧仰懇

睿慈俯鑒疊災慘苦將夏秋兩被九十分重災田地破格

特賜蠲免其六七八分不等田地

准予夏秋並免俾災黎免追比流離之苦得以各安耕鑿

及時播種來年麥秋有望上輸

國課下遂民生咸戴

浩蕩洪恩於無旣矣除冊結分送部科查核外臣謹會同

總督臣傅臘塔總漕臣董訥合詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史

臣

鄭端謹

題爲缺丁不除廢地不豁包賠愈苦荒逃日甚考成民
命萬難保全懇恩通詳停徵候

題同仁邳宿急蘇永困事該

臣

看得睢寧縣地勢低窪

濱臨黃淮兩河從前疊遭水患以致地畝坍塌廢戶口
逃亡先於康熙二十八年恭逢

聖駕南巡該縣里民張騰蛟等以糧田永廢等事具本

奏請當蒙

勅部咨行前撫臣洪之傑委官勘明濱河廢地一千七十

九頃四畝七分小河廢地一千一百六十頃四十一畝七釐又缺額人丁八千三丁缺銀二千五百五十九兩三錢八分零具

題請蠲部覆睢寧縣濱河廢地并小河廢地該督撫雖稱委准徐道常君恩勘明等語但睢寧縣地方歷年徵收錢糧且缺丁銀兩原任總漕蔡

題准攤入地畝內徵收載入全書奉行年久應將該督撫所請之處均毋庸議等因咨行遵照在案續於康熙三十年六月內據淮徐道僉事劉暲淮安府知府王穀韋睢寧縣知縣劉公裕申詳缺丁廢地額賦虛

懸歷年壓欠賠累無休地方荒疲日甚復據士民合詞哀籲亟請

題豁以蘇積困等情臣隨批行江蘇布政司查報去後

今據署布政司事江常鎮道叅議楊嘉詳報專委淮徐道督同淮安府親詣該縣覆加察勘逃廢情真取具冊結前來臣查睢寧縣濱河廢地久經前撫臣湯斌趙士麟節次委勘

題明迨後災民具

奏隨蒙

聖恩勅行查勘睢民困苦情由已荷

睿慈洞鑒矣祇因部臣以睢寧地方歷年徵收錢糧且缺
丁攤徵年久未議蠲豁然稽諸往牘康熙二十六年
以前睢邑地丁錢糧歲有逋欠多則盈萬少則數千
從無一年清楚經徵各官屢受叅黜終無完補幸於
康熙二十八年欽奉

上諭特免江南積欠始得蠲除而康熙二十八年則有未
完銀一萬一千餘兩經徵知縣盧信鴻部議革職康
熙二十九年則有未完銀一萬二千餘兩經徵署印
宿遷縣知縣李遇桂泰興縣縣丞趙之弼接任知縣
劉公裕部議罰俸降級節年奏銷年限各冊在部可

稽也夫錢糧編有定則催科歲有考成如果有田可
耕有丁可問經徵之官安肯甘心惰悞自罹降革應
輸之民豈敢故意拖欠甘受敲扑總因災患之餘民
貧地瘠現丁熟田之賦尚苦輸納不前廢地缺丁之
糧奚堪包賠重累所以額賦虛懸雖有徵收之名究
無徵收之實官民交困公私並絀非一日矣若非

皇恩蠲恤里民包賠無已懼累逃亡勢所必至將來

國賦愈逋民生愈困臣謬膺撫綏之責不敢不據實直

陳我

皇上如天好生頻年以來蠲租免賦奚啻千萬恤災賑乏

恒厯

睿懷且邳州宿遷二邑渰地逃丁已蒙

皇恩蠲豁數十萬災黎無不含哺鼓腹咸慶更生茲睢寧
縣廢地缺丁事同一例倘蒙

睿慈大沛

恩諭將前項無徵地丁本折漕項錢糧自康熙三十年爲
始槩與蠲除以前舊欠並免追徵則殘邑之積困頓
甦漸次招徠墾闢休養生聚民力旣足之後
國賦自可復額在目下不過暫蠲逋欠之虛數異日可
收盈寧之實效

浩蕩洪恩出於

聖裁非_臣之所敢妄干也除冊結送部查核外_臣謹會同
總督臣傅臘塔總漕臣董訥合詞具

題伏乞

睿鑒施行

巡撫江寧等處地方提督軍務兼理糧餉都察院右副都御史臣鄭端謹

題爲靖邑坍江田畝錢糧包賠累民仰請

睿慈蠲豁以廣

皇仁事該臣看得常州府屬靖江縣地處濱江田土坍漲

靡常先據原任江蘇布政使李國亮詳報該縣坍江折實平田五千五十八畝零應徵折色銀四百五兩五錢五分零本色米麥一百二十一石九斗一升零屢據士民籲控賠累情由飭令印官查勘實係坍沒入江錢糧無從徵辦呈請

題豁臣查該縣全書內刊註漲則陞科通縣均減坍則豁賦通縣均加未便遽請豁除駁行確查去後今據署布政司事江常鎮道叅議楊嘉詳覆靖邑田畝向有平沙灘三則全書刊註均減均加原合各則一例增減繼因灘田改歸蘆課錢糧各分欸目遂不能照均減均加之舊例今灘田之陞漲悉歸蘆課五年一丈較舊額已增六萬有奇而平沙二則康熙五年清丈以增抵減亦有報陞田四千四百畝零業已計畝加徵並未通縣均減是遇漲已加額科徵遇坍若仍舊均加將見田日少而賦日增民累終無底止等情前來臣查田糧按畝起科增減不容牽混若遇漲均減則有虧於

國課而遇坍均加又有病於民生理應分別坍漲照數陞除庶無混淆隱射之弊靖邑全書刊註均減均加原屬因循舊本茲從前漲增之田既不照舊例均減已經陞科輸賦則歷來坍沒之糧自不便照舊例均加以貽闔邑包賠旣據該府縣丈勘確實具有不扶甘罪印結所當據實

題明仰懇

睿慈俯鑒前項坍江田畝小民賠糧實爲苦累特沛

恩綸自康熙三十年爲始准予蠲豁以前舊欠並免追徵
嗣後如有坍漲應令該縣隨時查勘申報容臣核實
咨部增除於以廣

皇仁而蘇民困杜欺隱而免包賠

國計民生兩有攸賴矣除冊結送部查核外臣謹會同
總督臣傅臘塔合詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲欽奉

上諭事該臣看得淮屬屯田陞科錢糧先因海邳宿桃沐
安六州縣以地處荒疲四載併徵小民力難措辦詳
請分年帶徵經臣會疏

題請部覆屯田係給本墾熟康熙二十五六年已經
收過屯租補還借項二十七年應徵起存銀米俱經
捐免補徵漕項未爲不得二十八九并三十年錢糧
自當按年補徵完報并將催徵未完各官照例補參

等因隨經轉行遵照去後今據署江蘇布政司事江
常鎮道叅議楊嘉署江安督糧道事江南驛傳道僉
事于準會詳當日屯員冀圖功名領本招集流民開
墾迨後停屯給主屯戶畏追前本盡皆四散今日領
田之人原非當日領本之戶若以一歲兼數歲之徵
萬不能完請仍照前議分年帶徵又贛榆一邑本年
被災屯田錢糧併請一例寬恤等情前來臣查屯田
累民蒙

皇上洞鑒特行停止仍令清查給主失業窮黎復安耕鑿
無不感戴

聖恩家謚戶頌陞科錢糧自行急公完納祇緣從前田畝
混淆清查維艱前撫臣洪之傑具疏

題明專委道員確勘往返駁查屢經叅展臣於康熙二
十九年十一月蒞任復加嚴督始得告竣於康熙三
十年二月內彙冊

題報部覆補徵已在本年四月是奉

旨停屯雖係二十七年而清查給主則非盡係二十七年
也屯田磽瘠收穫無幾數年錢糧責令一時並納民
力實所不能况本年淮屬地方夏秋疊罹災傷民生
困苦幸蒙

皇仁蠲租發賑得免流離前項屯糧若遵部文勒限催徵
有司顧畏叅罰敲扑頻加必至顛連失所不特陞科
之屯賦究不能完抑且現年之正供併致逋缺茲據
司道等官激切籲詳臣敢不據實

上聞爲民請

命仰懇

睿慈俯將邳宿等七州縣屯田應徵康熙二十七年分漕
項錢糧准於三十年帶徵其二十八九年兩年存本
折錢糧緩於三十一二年帶徵不過暫寬時日原無
損於

國賦而培養民力自收效於將來億萬灾黎咸沐

皇恩於無旣矣臣謹會同總督臣傅臘塔總漕臣董訥合

詞具

題伏乞

睿鑒施行

巡撫江寧等處地方提督軍務兼理糧餉都察院右

副都御史

臣

鄭端謹

題爲江都第一大害一田兩賦叩恩循例通詳撥解經
制額餉除豁浮加借項以普

皇仁以廣仁政急救萬民事該

臣

看得江都縣牧馬草場

同地於額編正賦之外重徵租米先據藩司以一田

兩賦場民苦累具詳請豁經

臣

咨部茲准部覆事關

禾豁錢糧不便據咨遽議行令具題到日再議等因

隨經備行江蘇布政司遵照再加確查去後今據署

布政司事江常鎮道叅議楊嘉查明詳請

題豁前來臣查江都縣草場回地全書編載止徵租銀其納稻改米之由始於康熙元年間因海氛未靖奉旨遷棄各沙行令洲民安插內地遂於草場回地內抽田一萬三千九百餘畝分給洲民耕種餬口當據該縣士民公捐銀六千四百三十八兩給發場民以償田價按畝計算每畝不滿五錢原非民間售田之價可比也迨至康熙九年間遷民奉

旨復業所遺場田卽應歸還原戶又據合邑士民具呈以場民曾受捐銀議令每得價一兩歲輸租稻四斗共稻二千五百七十餘石以備地方賑濟續於康熙十

五年間因吳逆變亂需餉殷繁准有部文搜查無碍錢糧以濟軍需前撫臣馬行據藩司將前項租稻暫議充餉每石準米五斗共米一千二百八十七石零就便奏抵狼漕各營兵米俟事平之日仍歸備賑咨明戶部在案查此項場田租米原非正項卽當日所得田價亦士民公捐並非動帑支給場民歷年完納稻米已償捐銀數倍况當日原議暫時充餉事平仍歸備賑今蕩平已久若仍令按歲輸將一田兩賦殊滋民累所當仰請

睿慈勅查原案准予蠲除俾場民之重困獲甦頂頌

聖恩於無既矣臣謹會同總督臣傅臘塔總漕臣董訥合
詞具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲欽奉

上諭事該臣看得興邦致治之道不出用人一事而用人
分布內外又不出文武兩途文以振紀綱正風俗爲
根本而不在簿書期會之末武以明分數知虛實爲
要務而不盡操戈躍馬之間我

皇上文德聿修武功大定立賢無方知人善任右文左武
張弛咸宜已治而益求長治已安而愈圖久安因思
鞏固金湯須得素練之士折衝萬里尤貴統馭之才

臣等各舉所知以備干城之選臣敢不仰體
聖意舉所素知但文武臣僚總以忠孝爲本而行師動衆
更以整暇爲先古之名將多謹重周密方可保其初
終未聞恃才傲物而能善全功名者故薦人爲難而
薦武臣爲尤難倘非真知心術見其行事斷不敢輕
以入

告臣查現任貴州大定鎮標左營遊擊雷如山西平陽府
蒲州人由行伍出身值吳逆之變先於岳州軍前効
用繼委偏沅撫標右哨千總後
題授偏沅撫標左營守備復於康熙二十年六月內進

勦黃明有功

題叙在案康熙二十四年八月初三日於恭報擊敗賊
衆等事案內部覆加一等仍帶軍功紀錄一次康熙
二十七年湖廣裁兵告變該弁隨提督徐治都協力
進勦奮勇爭先掃滅夏賊克奏捷績俸滿陞授貴州
大定遊擊現在任事臣撫偏之時見其人才英爽曉
暢軍務營伍嚴肅士卒悅服且賦性朴直處事詳明
旣無驕諂亦不輕躁臣愛之重之教以名將忠義之
書彼卽能心領大意以身許

國感奮激昂思齊古人臣竊謂其練達老成能堪負荷

倘蒙

皇上破格擢用授以重鎮將見壁壘一新軍威大振以整以暇戰守兼優卽論其人物標表弓馬嫻熟亦可謂才技出衆無愧鷹揚之選矣臣謹特疏保

題伏乞

睿鑒施行

巡撫江寧等處地方提督軍務兼理糧餉都察院右

副都御史臣鄭端謹

題爲災邳商稅無徵久奉

恩綸特免籲請具

題以沛

皇仁以拯殘區事該臣看得邳州缺額商稅銀兩歷年懸

欠無徵經臣咨部請豁部覆仍速照數徵收補足原

額等因隨行江蘇布政司遵照去後茲據布政使張

志棟詳稱該州商稅原於康熙十三年間

題准部覆儘收支用如地方復舊年歲豐足之日仍照

舊徵輪迨至康熙十七年花山決口二十四年又被
異水冲滄較之從前尤爲殘廢實難按額取盈呈請
題裕前來臣查邳州商稅額編銀六百一十一兩二錢
零原出自商賈往來貿易隨貨輸將前因該州疊罹
灾患人戶逃亡商賈流散以致缺額過多經前撫臣
馬 於邳邑凋殘等事案內具

題自康熙十三年爲始照揚屬稅銀之例儘收儘解以
充實用部覆邳州稅銀該撫旣稱疊罹灾傷流亡載
途實係無徵等語應將未完銀兩准其蠲免其每年
額徵銀六百一十一兩零應照揚州之例儘收支用

如地方復舊年歲豐足之日仍照舊徵輪等因覆奉
俞旨欽遵在案迨後十三十四兩年分未完亦經於奏銷
案內覆允銷結惟十五年以及十八年迄今歷奉部
駁照額徵解然稅銀原賴商貨來州零星投納若商
販不來則額稅無徵非若地丁錢糧有欠戶可追者
比是以年年懸欠催徵各官徒受叅處究不能完補
分毫節年奏銷年限冊案在部可稽止有康熙二十
八年分缺額銀五百八十五兩九錢三分零該州知
州孫居湜因年限考成恐干降罰自行賠墊全完亦
於年限冊內註明報部可考其康熙二十六年以前

未完銀兩幸逢

聖駕南巡欽奉

上諭蠲免積欠錢糧始得槩邀

恩豁又蒙特頒

上諭諭戶部朕前巡幸江南凡所經歷於編氓疾苦必詳加體察如傷念切每沛恩膏朕過邳州親見彼處田地多爲水滄沒耕耘旣無所施賦稅於何取辦其見在被滄田畝應納地丁及漕項錢糧俱行蠲免歷年逋欠亦盡與豁除該督撫卽行出示徧曉窮鄉仍不時廉察倘有不肖官員仍行私徵者題叅從重治罪以副朕愛恤

民生至意等因欽遵在案是邳地之荒殘民生之疾芒

久在

皇上睿照之中所以

特沛恩綸加意軫恤灾邑殘黎無不感頌

皇仁謳歌載道前項缺額商稅銀兩實係無戶可徵無人可問若必責令照額徵補勢須攤派包賠商賈聞風懼累益致裹足不前雖有催徵之名究無完補之實

臣身在地地方敢不仰體

睿慈據實

上聞倘蒙

特頒恩諭將該州無徵缺稅准與豁除嗣後儘收儘解歸入雜稅項下造報奏銷臣飭督司府各官嚴加稽察如有徵多解少卽以侵隱指叅從重治罪俟地方豐足商賈輻輳之日仍照原額徵輸俾積累盡除則流亡漸集人民旣庶則商貨自充暫蠲目前無徵之虛數以收將來盈寧之實效出自

皇上洪恩非臣所敢擅請也臣謹具

題伏乞

睿鑒勅部議覆施行

巡撫江寧等處地方提督軍務兼理糧餉都察院右

副都御史臣鄭端謹

題爲請定漢官回籍等事臣等會看得漢官回籍一

案部文內稱查定例止載革職解任休致官員係漢人者速令回籍如無故不卽回籍或在別處居住或中途逗遛不回者送刑部從重議處其容畱地方各官俱論人數罰俸降級並未定有限期且處分不嚴以致此等官員不速回籍潛住京師流行別省嗣後內外文武革職解任休致等官俱照旗員歸旗例勒限五個月起程回籍逾限與容畱者俱照旗員例議

處等語是從前廢員不行回籍原有處分定例今但
比從前加嚴未嘗於定例外多增項款今四司會詳
內開革職解任休致等官外或有本身已故妻子無
家可歸置有田房子孫婚配入學者或有現任官員
籍係別省身在任所家口寄住江南者或有原籍別
省考有職銜尚未出仕暫住江南者或有原籍江南
前在別省出身今又仍歸原籍者或有原係本省寄
居別府州縣者或有原係別省今貿易鹽鹺在揚州
辦課者或有俸滿干總在部候推家口仍在原任地
方者此等均非革職解任休致之官或身已物故子

孫久夷平民之列既不慮其串通夤緣自不至於作
弊生事原在部議之外似可聽其隨便安插至於未
定新例以前革職解任休致等官或無力歸家久住
別省入籍當差者父母已經葬埋兒女俱聯姻眷如
此等類若槩行驅逐恐祭掃無人既非所以教孝骨
肉分離亦必至於傷慈且故鄉望絕早已無家可歸
今促之使去不特流離顛沛有疾病死亡之憂亦與
部議止嚴嗣後並未追查從前之意不相符合但事
在創始而部文亦未嘗指明奉行各官不無疑慮我
皇上仁恩如天包容遍覆莫非

皇土莫非

皇臣無不矜憐憫恤有何畛域可分臣等仰體

皇上浩蕩鴻慈不忍一物失所之意先遵照部行將現在革職解任休致官員勒催回籍不許容畱外其餘各項部議未曾言及者仍乞

睿鑒勅部再行定議明白指示庶地方各官不至迫促煩擾而回籍各官亦得以分別去留不至冒昧從事矣

臣謹會同總督臣傅臘塔合詞具

題伏乞

睿鑒施行

吏部尚書臣李天馥等謹

題爲重賦三載全完懇請特

題以鼓能吏事吏科抄出江寧巡撫鄭端題前事康熙三十年十月初八日題十一月初四日奉

旨該部議奏欽此該臣等議得江寧巡撫鄭端會同兩江總督傅臘塔疏稱吳江縣知縣祖允焜催征有法康熙二十七八九年分地丁本折錢糧三載全完部定卽陞之例錢糧難完州縣督撫將本省所屬官員內循良慈愛征糧有法者保題調補三年內果能將經征及分年帶征錢糧全完據實具題准其卽陞等因

但題請調補之處誠恐人地不克相宜故須調補責其成效如部選已得其人錢糧全完者實同一轍所有吳江縣知縣祖允焜將經征本折正雜錢糧既已三載全完與例相符應否准其卽陞相應題明以聽部議等因前來查祖允焜尚有未完漕項學租等項錢糧之案未銷今該撫鄭端會同總督傅臘塔旣稱祖允焜將二十七八九年正雜錢糧全完開寫定例題請卽陞應將祖允焜准其離任照例卽陞其未銷之案行令該撫速催完結具題可也

康熙三十年十一月十三日題本月十四日奉

旨依議

吳江縣賦重事繁宰是邑者率二三載卽掛吏議以去先大人特疏題請鼓勵前此所未有也全疏遺抄謹從部中檢此覆疏以誌梗概男知寵等敬識



理

一
夕
生
三
ノ
イ
ノ
糸
二

